



Romana I[^] Editzione de su Prèmiu de Poesia sarda “Tiu Finu”

de Domitilla MANNU



Sàpadu sero, su 14 de capidanni, su salone de su tzentru sotziale de Romana non at càbidu totu sas pessones chi sunt acudidas a sa tzerimònia de premiatzione de sa “I[^] Editzione de su Prèmiu de Poesia Sarda, Tiu Finu” dedicada a Gavinu Piredda, poete mannu a bolu e a taulinu, mortu in su 1993. Sos romanesos ant leadu parte a beru in medas e cun piagheres, fint presentes poetes, amantiosos de poesia fintzas foristeris, cunsizeris,

assessores, su preideru, Don Valdomiro Do Santos. Su s'indigu de Romana, Lucia Catte cun Giovannangela Piredda, assessore a sa cultura, umpare a totu s'amministratzione comunale si nde podent tènnere mannas, e cun rejone, de sa bona resessida de custa prima editzione, chi ant s'ighidu e contivizadu de pessone. Sa cuntentesa l'at espressada, sa prima tzitadina, cun peràulas cumpridas, cando at saludadu e torradu gràtzias a totu sos chi

ant agiuadu e contivizadu s'ordininzu de su Cuncursu. "Est dovere de s'Amministrazione Comunale, in su chi podet, de fàghere a manera chi sa limba e sas traditziones sardas siant amparadas e duncas, custu Prèmiu nàschidu pro fàghere onore a Tiu Finu, fizu mannu e istimadu de Romana, est istadu unu modu deghile pro comintzare a fàghere carchi cosa a proe de custu intentu". A pustis custu cuntzetu est istadu aprufundidu dae Franco Piga, at ispiegadu su proite e su significu chi tenet sa nàschida de cust'àteru cuncursu de poesia, at afirmadu cun fortza chi "... est una manera pro comintzare unu caminu, chi s'est bene s'ighidu podet giùghere a tesu meda". At faeddadu de cantu sa poesia siet istada importante pro sa cultura sarda chi "... pro mizas de annos, at cunsignadu a sa poesia, tota sa sabiesa e totu s'ischire de unu pòpulu". Augurende chi a un'àter'annu sos romanesos, massimu a totu sos giòvanos mustrent coragiu e presentent sas poesias issoro, at cumpridu sa relata cun custas peràulas, cumpartidas e agradessidas dae totus "... cheret chi

torremas gràtzias a sa poesia, proite est mèritu sou si zente meda s'est torrende a acurtziare a sa limba chi ant tratadu sos mannos nostros, e chi



resessit a mantènnere bios cuntzetos e sentidos chi alimentant s'orgogliu e sa fieresa de unu pòpulu, traste bonu, duncas de impitare a manu piena e chena timòrias". Su Coru polifònicu "Su Romanesu" cumpostu, dae giovanos cun boghes a beru bellas e dirigidu dae su Mastru Piero Concu at incantadu su pùbblicu cun duas cantones iscritas dae Gavinu Piredda; *A su paese de Romana e Celeste*. A su Prèmiu ant cuncùrridu medas de sos mezus poetes sardos e sos nòmenes de sos premiados nde dant testimonia. Sas poesias imbiadas ant afrontadu temas vàrios e de importu, chi pertocant sos sentidos umanos e sos problemas de sa sotziedade. Sa Giuria fit cumposta dae poetes nòdidos e dae amantiosos de poesia: Franco Piga, Presidente, Giuanne Fiore, Giangavinu Vasco, Giuseppe Tiroto, Luciano Panai, Gavinu Loria, cumponentes, e Giovannangela Piredda, segretària ant isaminadu sas 54 poesias chi ant cuncùrridu a sas duas setziones e detzisu de assignare custos riconnòschimentos:

SETZIONE A

1° ALTANA ANTONIO	FORTZA DISPARI
2° SANNIA ANTONIO	BALLOS DE PITZINNOS
3° PORCHEDDU ANGELO	CUSSORZA NOALE

MENTZIONI DE ONORE

MURGIA SALVATORE	FORTUNA 'E L'AER CONNOTU
ARDU ANGELO MARIA	SI ANCORA TI PREGAN
PIRA GIOVANNI	RUSIGNOLU

SETZIONE B

1° CHIAPPORI SANDRO	NUSCU DE NARBEDDA
2° BAZZU ANTONELLO	TEMPOS MALAITTOS
3° CARTA BROCCA GONARIO	ANIMAS

MENTZIONI DE ONORE

SPANO SARTOR MADDALENA	BOLA MARIPOSA
DELOGU GIUSEPPE	TERRA LUBADA
ARRU STEFANO	GHIA, SARDIGNA!

SIGNALATZIONES

FALCHI RACHEL
CAU ELIANO
ERRIU DANTE

FIZOS DE CUST'ERA
UNU MUTTU ANTIGU
TERRA DE NURAXIS

Prèmiu pro sos poetes romanesos

SALVATORE COCCO pro sa poesia IN AMMENTU DE SU POETE FINU
PIREDDA.

A pustis de sa premiatzione, est istadu cunsignadu unu donu pro ammentu de sa die a Antoni e Angela, fizos de Gavinu Piredda, torrados a Romana pro s'occasione. Acabbada sa tzerimònia, totu sos presentes si sunt bistentados e ant fatu onore a su cùmbidu, maicantu agradessidu e a beru bene ammanizadu dae s'Amministratzione Comunale. A medas annos.

Tàtari 18/9/2013